

Su 26 de cabudanni: Sa Die europea de is limbas



Dae 2001 su **26 de onniannu est sa Die pro afestai is limbas europeas.**

S'Europa tenit unu tesoru linguisticu mannu meda cun

24 limbas ufizialis de 60 comunidadi chi chistionant una limba regionali o de minoria, sena s'iscarèsciri is limbas chistionadas dae is tzitadinus chi benint dae àterus istadus e continentis. Pròpiu pro marcai s'importu mannu chi est custa richesa linguistica, s'Unione europea e su Consìgiu d'Europa ant proclamau su 2001 Annu europeu de is limbas.

Bidu su sutzessu mannu de custa Die de festa e cunsiderau puru chi is limbas sunt ciumentu de su faghene s'Europa, est istada istituída sa DIE EUROPEA DE IS LIMBAS pro afestai assumancu una die a s'annu cun sa punna de gai sensibilidadi a su pùblicu faci a su plurilinguismu in Europa, cultivai is diversidadi culturalis e linguisticas e ispronare s'amparu de is limbas intra de totus, aintru e foras de

s'iscola. Custa Die est su 26 de cabudanni de onniannu! Afestamus custa Die.

Novas Baressesas at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiriztu serviziocultura@comune.baressa.or.it iscriendi su nòmini, su sangunau e "bollu arriciri *Novas baressesas*". In prus, s'at podi ligi puru in sa bacheca comunali o agatai in medas atividadi commercialis de sa biddu o in sa biblioteca comunali



Comunu de Baressa
Provìntzia de Aristanis

Sa redatzioni de *Novas Baressesas* est contivigiada de su Servìtziu linguisticu sardu e s'Assessorau a sa Cultura de su Comunu de Baressa.

S'isportellu linguisticu est a disponimentu de tzitadinus, maistus de iscola, professoris e istudentis po cali si siat informatzioni, fundamentu, duda e crosidadi asuba de sa lingua sarda, po consulèntzias didàticas e po contzillus chi pertocant is arrègulas de iscridura de su sardu.

Su Servìtziu in lodàmini at a èssiri abertu::

DIE	DATA	ORÀRIU
Martis	01.10.2013	11.15 – 14.15
Lunis	07.10.2013	08.00 – 14.30
Martis	15.10.2013	10.10 – 13.10
Lunis	21.10.2013	08.00 – 14.00
Martis	29.10.2013	10.40 – 13.10



Comunu de Baressa
Provìntzia de Aristanis

Novas Baressesas

☎ 0783-930049 Fax 0783-930118
e-mail: info@comune.baressa.or.it

Fòlliu periòdicu de informatzioni istituzionali de su Comunu de Baressa

**Responsabilidadi e proprietadi de su
Comunu de Baressa (or)**

Annu III, n. 9

Acabau su 1° de su mesi de lodàmini 2013

Novas de limba sarda



Dae cando sa Lege 482 de su 1999, aplichendi s'articulu 6 de sa Costitutzioni de sa Repùblica Italiana, at reconnotu e amparadu sa

limba sarda puru, faghende-ddi fàghere passus in dae in antis faci a s'otenimentu de sa matessi dignidade de sa limba italiana fintzas in is logus dae ue s'istadu de minorizatzioni dd'aiat esclùdida (s'Amministrazione pùblica, s'Iscola, s'Universitàdi, àterus), una de is chistionis de fundamentu fiat sa de aprontare ainas e fainas pro pòdere afortiare sa connoschèntzia de su sardu a ònnia livellu de sa sotziedade.

Cun custa punna, est partu pretzisu a cunsiderare e pònnerre paris cuatru bisòngius:

1) **sa divulgatzione**, est a nàrrere su de arribare a cantus prus faeddadoris possibilis, cun atentu mannu pro is dependentis de s'Amministrazione pùblica;

2) **sa modularidadì e gradualidadì**, est a nàrrere su de aprontare ainas utilosas chi siant a tenore de su gradu de cumpetèntzia diferenti chi sos faeddadoris tenint de sa limba sarda, duncas su de pigare a cunsideru su fatu chi is bisòngius formativus non sunt is matessi pro totus;

3) **su discansu e sa pratitzidadì**, est a nàrrere su de cunsiderare sa disponibilitadi de tempus chi is utentis tenent pro acumprìre su caminu de formatzione;

4) **s'iscientifitzidade**, est a nàrrere su de assegurare s'impreu de modellos de imparu (in sa carrera de s'insegnamentu e in cussa de s'aprendimentu) chi siant de rigore, siat metodològicu siat de capia.

Cun custos piessignos est nàschidu su cursu e-learning www.dischente.or.it, chi oe est una de is

ainas prus innovativas in s'àmbitu de s'imparu de su sardu; cun custus inditus, in custus annus, si sunt cuncordadus progetus de importu comenti su *Postale de sa Limba sarda* e is addòbius de is **DIES DE SA LIMBA SARDA**.

Su programma de is Dies de sa Limba Sarda 2013, dies de formatzioni in is Iscolas e in is Comunus, mustrat comenti sa Provintzia, paris cun s'Ufìtziu de sa Limba e de sa Cultura Sarda, siat sighendi in custu camminu circhendi de fàghere a cumprèndere a is pitzinnus ca sa limba sarda faghet parte de s'identidade issoro, chi no est e non podet èssere "Birgòngia!", chi sa cultura sarda est, e depet èssere, unu instrumentu de connoschèntzia a fundamentu de sa crèscida de ònnia sardu, chi ònnia limba, finas cussa sarda, paris cun totu is limbas chi si podent imparare, est richesa e ismànniat su mundu nostru ponendi-nos a cunfrontu cun àterus pòpulus e àteras culturas.

Is cursus in is Comunis sunt unu dovere, pro chi

Dae su 26 de cabudanni a su 5 de santandria 2013



totus, mannus e pitius, potzant connòschere mègius sa limba sarda e tènnerre un'oportunidade in prus pro l'impreare.

Nois puru, comente a **Isportellu linguìsticu intercomunali de is comunus de Baressa,**

Bobadri, Abas, Ollasta, Sini, Bàini, Pau e Crucuris semus sighendi custu camminu e intra de pagu dies, in Santugaine (o mesi de lodàmini), emus a incumentzare **duus cursus de limba sarda** pro is dependentis comunalis e pro totu is residentis de custus comunus.

In prus **Lunis 21 de santugaine 2013** (Lunedì 21 ottobre 2013) **de is tres a is ses de merie (dalle 15.00 alle 18.00) in sa Sala cunferèntzias de su**

Comunu de Abas, comunu chi fait parti de su servìtziu limba sarda intercomunali cosa nostra, s'at a faghère unu addòbiu formativu pro connòschere su giassu internet de e.learning aparitzadu de sa Provintzia de Aristanis **DISCHENTE: IMPARARE A ISCRIERE SU SARDU**.

In prus, pro chi bolit sighiri in sa Provintzia de Aristanis cali ant a èssiri is addòbius aparitzadus in is iscolas, pro faghère a cumprèndere cale podet èssere su tempus benidori de sa limba sarda, custu est su calendàriu:

- **Chenàbura 4 de santugaine 2013** (Venerdì 4 ottobre) **in s'Istitutu de istrutzioni Superiori de Ilarzi** (Ghilarza) e **mèrcuris 16 de santugaine** (mercoledì 16 di ottobre) in su **litzeu clàssicu de Bosa** dae is 9 a is 11 nch'at a èssiri **Antonio Ignazio Garau cun Quest'anno la mosca già è poco aggressiva!**

- **Mèrcuris 9 de santugaine** dae is 4 a is 6 de merie Cursu FILS Formatzione insegnantis Limba Sarda in sa sala cunferèntzias Setore Promotzione de su territòriu in Pratzza Eleonòra – Aristanis.

- **Lunis 4 santandria** (lunedì 4 novembre) 2013 in su **Litzeu Clàssicu de "De Castro" de Aristanis** e **martis 5 de santandria 2013** (martedì 5 novembre) in su **lizeu Iscientificu de Laconi** nc'at a èssiri "Birgongia!" Cun Alessandro Mongili.

- **Martis 1 de santugaine 2013** (martedì 1 ottobre) in su **Litzeu Iscientificu de Terraba e giòbia 10 de santugaine** (giovedì 10 ottobre) in su **Lizeu iscientificu de Aristanis** de is 9 a

is 11 de mengianu: ***A Nanni Sulis***, cun Duilio
Caocci.